

HITZKIRCH: igl Chor viril Surses alla festa da cant

Fò part agl concert da festa

pb. La proxima fejn d'emda è a Hitzkirch (LU) la festa da cant dalla Svizra interna. Tranter igls 100 chors tgi sa participeschan è er igl Chor viril Surses. El sa preschainta davant igls experts e fò part agl concert da festa dalla sonda seira.

Schi discurregn dalla Svizra interna an connex cun la festa da cant, alloura èn integros cò igls cantuns Lucerna, Zug, Sviz, Uri, Sursilvania e Sotsilvania.

Digls 100 chors tgi vignan chels treis deis digls 14-16 da zarcladour a Hitzkirch èn circa la mesadad dalla Svizra interna e l'otra mesadad è digl rest dalla Svizra. Er quatter chors grischuns: igl chor «patschifi » da Coira, igl Chor viril Jenaz, igl Chor viril Lumnezia ed igl Chor viril Surses.

Chels 100 chors cantan a parteir dalla sonda dumang allas 8.00 anfignen las 16.00 ainten treis diversas localitads ed alloura la dumengia dallas 9.00 anfignen las 13.15.

Digl reminent èn er Grischuns tranter igls experts: Rainer Held, scu capoexpert ed agl team fon part Peter Appenzeller, Retus Giger, e Martin Zimmermann.

Egn da treis chors agl concert da festa

Igl Chor viril Surses canta la sonda allas 14.30 las sias treis canzungs da paia ainten la baselgia da sontg Pankratius: «Igl cant» dad Anton Bruckner, «Lux Aurumque» dad Eric Whitacre e «La Pizza» da Gion Giusep Derungs.


Igl Chor viril Lumnezia canta er la sonda ainten la madema baselgia gio allas 10.45. Lour canzungs da paia èn: «Dostonjo jest» da Dimitro Bortniansky, «Ei vegn notg» da Gion Antoni Derungs ed «Il giuven pur» da Gion Giusep Derungs.

La sonda seira allas 19.30 dattigl, er ainten la baselgia da sontg Pankratius en concert da festa. A chel sa participeschan treis chor. I antscheva igl Collegium Vocale zu Franziskanern. Gl'è en chor masdo cun principalmaintg absolventas ed absolvents dallas scolas otas da musica. Dirigenta è Ulrike Grosch.

Scu sagonda furmaziun è vedlonder igl Chor viril Surses. El canta ovras da cumponists rumantschs scu er da divers cumponists da diversas parts digl mond. Uscheia è da san-teir tranter oter er igl ciclus digls maletgs da Giovanni Segantini cun la cumposiziun da Gion Giusep Derungs ed igl text da Peder Caotsch.

La fejn digl concert da festa fò igl «Schweizerischer Jugendchor» sot la batgetta da Nicolas Fink. Igl 45 cantadours e cantadouras giuvenils tranter 16 e 25 onns vignan da tot la Svizra ed els uneschan er la cultura cantica da nossa tera an furma fi g saragna.

Tgi igl Chor viril Surses fò part talmaintg activ a chesta festa da cant dalla Svizra interna n'è betg casula. Igl sies dirigent, Rainer Held veiva gio dad onns a Lucerna ed ò dirigia igl chor da Hitzkirch. Professionalmaintg è el rector dalla partiziun musica alla scol'ota pedagogica Lucerna.



Ainten la baselgia da s. Pankratius a Hitzkirch sa participescha igl Chor viril Surses agl concert da festa dalla sonda seira allas 19.30.

Dumondas tigl plaz da vischnanca digital?

comm./mc Dattigl problems da carger giu ni installar igl plaz da vischnanca? Vessas gugent en'instrucziun persunala? Savez betg scu tgi vign fatg ena gruppa?

A parteir da dalunga stattan noss dus Super Users a disposiziun per tot las dumondas an connex cuagl plaz da vischnanca digital.

Contacte Adrian u Janine. Els sa legran d'Az saveir gidar!

Adrian Ballat: adrian.ballat@hotmail.com, 078 779 06 57

Janine Arpagaus: sutter.janine@gmail.com, 079 652 76 94

Davainta er te commember dad Anavantsurses! Daple infurmaziuns sot: anavantsurses.ch / info@anavantsurses.ch



Adrian Ballat...



... e Janine Arpagaus, stattan a disposiziun per cunsegls pertutgont la pagina d'internet crossiety.